

世界改造



著者全身肖像

世界改造目錄

上篇

第一章 世界何爲而改造	一
第二章 大同議會及大同政府之組織	一一
第三章 大同主義之綱要	一八
第四章 大同主義之進行	二一
第五章 大同會會則	二三
第六章 大同憲法	三一

下篇

第一章 大同主義下之政治制度	三九
第一節 城鎮鄉村	四〇
第二節 工人自治	五三

第三節	市議會與市政府	五五
第四節	地方議會與地方政府	五六
第五節	高級地方議會與高級地方政府	六五
第六節	國家議會與國家政府	六六
第七節	大同議會與大同政府	六六
第八節	結論	六九
第二章	大同主義下之經濟制度	八三
第一節	公民銀行制度	八三
第二節	儲蓄制度	九〇
第三節	金庫代理制度	九一
第四節	徵收代理制度	九三
第五節	結論	九四

第三章	大同主義下之教育制度	九七
第四章	大同主義下之軍事制度	一〇二
第五章	大同主義下之公斷制度	一〇六
第六章	大同主義下之交通事業	一一〇
第一節	陸上	一一〇
第二節	海運	一一三
第三節	空間	一一四
題跋		一一五

世界改造

上篇

第一章 世界何爲而改造

一

耕田而食、鑿井而飲、熙熙皞皞、優游於光天化日之原始社會、邈不可睹矣。自有文字記載歷史以來、強陵弱、衆暴寡、戰鬪爭奪、燒殺無已。而羣衆安寧之社會、悉被其破壞。此種破壞、歐亞皆同。或三五年而一破壞、或十餘年而一破壞、其幸者或休息至百數十年而一破壞。每一破壞、其直接受其荼毒、斷臂折頸、悲慘死亡者、固不可勝數。其間接受其蹂躪、顛連困苦、轉徙流離者、尤難以數學統計矣。嗚呼、吾人類應享之幸福、畢竟如斯耶。

二

自科學發達，機械革新，殺人之利器日精，破壞之度益烈。據最近之二十年而言，其在亞洲之中華，則戰爭之禍，殆無虛歲。死亡與損失之數，無從計算。其在歐美，則一九一四年至一九一八年之大戰，蓋爲全世所痛心疾首者矣。其直接死於槍林彈雨中者，竟達一千萬人以上。其因戰爭間接而死者，亦達六百餘萬人。其感戰爭之威脅，而起安寧上之恐慌者，全世人類，當過半數矣。至海陸空間軍械軍需之消耗，以及戰地與海洋因破壞所受之經濟損失，誠不知其幾千萬萬也。昔人於戰爭之禍，比之洪水猛獸，吾則以爲戰爭之禍，實慘於洪水猛獸萬萬也。

三

古時兵丁，或者老弱咸與。近世戰爭，盡屬青年。此千百萬強壯之青年，固皆活潑崢嶸，將以享受人世間之優游幸福者。彼何辜焉，而乃奪其幸福，迫而驅之於戰場，甘令其肝腦塗地，血肉橫飛耶。使此千百萬悲慘而死之青年，魂靈有知，必將同聲叫

屈矣。顧死者之痛苦有限，而生者之悲痛無窮。爲父母者，誰不悲痛其子孫。爲兄弟姊妹者，誰不悲痛其手足。孩提之童，誰不悲痛其父兄。至於千百萬之青年婦女，更莫不悲痛其相敬相愛之良人。吾聞號泣於晨昏，哀哭於都鄙者，與戰之國，舉目皆是。際此愁慘，天地爲之寒心，鬼神爲之涕淚。嗚呼，東西列強，固皆競事文明進化者矣，其文明進化，果如斯乎？亦皆競尙自由幸福者矣，其自由幸福，果如斯乎？

四

歐戰告終，多數同胞，痛定思痛，固有感激而悲者矣。回首戰地，瘡痍滿目，城邑兵墟，紙幣失其價格，食料貴於工資。大兵之後，加以饑饉，其起經濟上之恐慌，與糧食上之恐慌者，與戰之國，卒無幸免。微聞俄羅斯因凍餓而死者，有三百萬人，各交戰國中失其父母流離失所之童子，竟達百數十萬。德意志一國，僅缺乏乳汁，奄奄待斃之嬰兒，亦達數萬。（上述三項數目，著者曩曾閱諸報章，祇以記憶力薄弱，遂忘其確數，或者猶多也。）噫嘻，慘矣。是皆戰爭之所賜也。

歐戰之損失，大略如此。迴視吾中華民國十七年來之戰爭，其損失或不亞於歐戰。漢口爲國內商業中心，辛亥一役，悉成焦土。就最近之山東一省而言，飢餓而死者，何止數十萬人。其因食料不充，飢餓而待斃者，又何止數百萬。其爲飢寒所逼，扶老携幼，轉徙溝壑者，每日均有數千人。噫嘻，慘矣。是皆戰爭之所賜也。

五

人類社會，因戰爭所受之痛苦，既如是其慘，而列強之當國者，不曾悟也。當夫破壞之後，人口銳減，於是勵行製造國民政策。禁止男女獨身，懲罰女子墮胎，獎勵男女結婚，更獎勵其多育。千方百計，以謀下次戰鬪員之增加。迨夫人口增加，則又慮本國供給之不足。於是勵行侵略政策。吸收他國之金錢，強佔他國之土地，奪取他國之權利，奴使他國之人民。彼此侵略，衝突以起，遂不惜再驅其多數之活潑青年以死之。是亦不可已矣乎。何不思之甚也。嗟乎，使吾人類及早覺悟，則不必勵行製造國民政策也，償還男女之自由可也。不必勵行侵略政策也，彼此相安相通可也。

當夫承平之時，極力謀教育之普及，而其所以爲教，則皆勇敢殺敵，戰死沙場之鞭箠也。極力謀大量之稅收，而大多數平民，以辛勤汗血所納之稅款，則皆投入殺人與破壞之途也。極力謀工廠之擴充，與工藝之發達，而大多數工人，不分寒暑，不分晝夜，埋其首，鞠其躬，以辛勤勞瘁於工廠中者，半皆製造殺人與自殺之利器也。嗟乎，使吾人類及早覺悟，則當移其殺人之教育，而教以福人也。當移其殺人之金錢，投於福人之途也。當移其殺人之工廠與工藝，製造人類和平幸福之享用品也。吾十六萬萬同胞，時至今日，尙不及早覺悟乎。

六

自來國內戰爭，多起於一二人權利之爭奪。若夫國際戰爭，則不外侵略主義，及帝國主義之衝突而已。彼個人權利爭奪之戰爭，多數文明國家，今已絕迹。即勇於私鬪之中華，其爭奪亦將告終。獨是侵略主義，與帝國主義，猶方興而未艾，是則不思之甚也。夫人類之祖先，本皆一源，強之於弱，大之對小，盡其輔導友愛之情，則可，肆

其慘忍侵略之暴則不可。且人類之面貌膚色，雖因環境與氣候之關係，略有不同。而其腦筋中所具之平等公理，與所起之利害觀念，凡屬人類，無絲毫之不同也。我不以公理遇人，人亦不以公理相待。是故大者強者，雖千方百計，以謀侵略。而小者弱者，亦千方百計，以謀抵抗。或者抵抗之力，一時薄弱，暫行屈服。而其圖謀恢復之精神，則固不達其目的不止也。試觀已被瓜分之波蘭，屢蹶屢起，終以恢復。已被征服之南非洲，血戰經年，終得組織共和自治之政府。已被征服之南北美洲，二百年來，創建獨立之民主共和國，竟達二十餘國。此外被征服之社會，時起暴動，時謀恢復，聞之熟矣。由此以觀，則侵略主義之終歸失敗，彰彰明矣。

若夫帝國主義，則其失敗，與侵略主義，如出一轍。古昔之時，民智未開，帝國主義，或可徼幸於一時。今則交通大啟，文化日進，帝國主義，絕無成功之可能。蓋一國而抱帝國主義，則四鄰之國，亦必抱帝國主義以相抗。縱或四鄰弱小，但其爲自衛計，亦必聯絡他國，羣相結合，出其死力，以相抵制。如武力未充，則必藉口武裝和平，敷衍

於一時。迨至準備既足，則一旦暴發，莫可遏抑。卒之兩敗俱傷，人類社會，胥受其害。而帝國主義者之迷夢，終成泡影。法帝拿破侖，德帝威廉二世，俄皇尼古拉斯第二，皆抱帝國主義之最劇烈者也。當其驅數百萬雄兵，百戰百勝之際，固皆誇耀於一時。然其結果，拿破侖則困死孤島，德帝則逃命鄰國。至於俄皇，則檻送荒郊，且不能保首領以歿。是則抱帝國主義者，不但無成功之可能，且不能自保其身家矣。不但鄰國之人，羣起而相抗，國內之人，亦將羣起而攻之矣。今世各國當道，猶有抱帝國主義者乎，其亦可以猛然自反矣。

七

明哲之士，有感於戰禍之日烈也。於是有招集萬國平和會，以謀和平者矣。有組織國際聯盟，以評各國之紛爭者矣。有提倡軍縮會議，以謀縮小軍備者矣。亦有訂立非戰條約，以冀減少戰爭者矣。身任其事者，既慘淡經營以求之。而世人屬望之殷，亦當如饑者之望食，渴者之望飲也。顧兩次萬國平和會議，雖稱盛一時，而卒不能

禁止大戰之不發生。國際聯盟自成立以來，費力極巨，收效絕鮮。英之歷史學家韋耳斯，謂其仍爲昔日縱橫捭闔之外交公署也。英之政治家路易喬治，謂其爲一滑稽之新劇也。謂其前此之國際雙方會商，今改爲多方會商而已。前此之專擅獨斷，今改爲多頭聚議而已。兩君之言，於國際聯盟之效力，揭櫫靡遺矣。安望其能實現人類永久之和平幸福耶。至於軍縮會議，恐亦僅有其會議而已。非戰條約，恐亦僅有其條約而已。絕難實現人類之永久和平也。謂余不信，試觀美人所提議之海軍會議，及俄人所提議之陸軍議案，均遭失敗，即可知矣。第一次之華府海軍會議，固皆限制各海軍國之軍艦者也。只因限制其主戰艦，而未限制其輔助戰艦，與會各國，遂大增造其輔助戰艦。美人鑒於其仍與昔日限制海軍之意相背馳也，遂於去年，復有第二次海軍會議之提議。乃既遭意法之公然反對，又遭英日之暗中掣肘。可憐美人，一番熱忱，完全失敗。俄人提出之陸軍徹底減縮議案於國際聯盟也，竟遭全院一致之冷齒。由此以觀，所謂軍縮會議，所謂非戰條約，其效力不更可逆睹。

耶。

八

國際聯盟之效力，既如此其微。軍縮與非戰之效力，又不可必。然則斯世斯民，竟不能享受永久和平幸福乎？曰否否。欲求全人類真正之永久和平，則有大同政府在，大同政府者何？由六大洲各國家各地方之人民，選舉公正之代議士，組織大同議會。復由大同議會，舉出負責人員，組織大同政府。而大同政府下，有大同軍隊。有大同貨幣。有大同文字與教育。得以命令全世界之各國家及各地方政府。而各國家及各地方政府之軍事最高權，皆聽命於大同政府者也。蓋聯盟與軍縮非戰等事，皆不過和平幸福中之枝葉問題。而大同政府，則全人類永久和平幸福之根本解決也。

九

世變急矣。時機迫矣。全人類根本解決之大同政府，不可緩矣。少數軍事家與預言

家，謂下次世界大戰，有所謂飛行礮者。巨礮與飛機，合而爲一，礮彈炸裂，礮身亦變爲礮彈，測準地點，用無線電以指揮之，每炸一處，玉石俱焚。有所謂電光殺人者，放射一種特製之光線，光線到處，人物俱死，儼如動物之受雷電擊死者然。又有所謂毒氣殺人者，製造一種烈性之毒氣，放入敵境，則其人畜草木，立時皆失顏色，並失生機。此類戰爭，其死亡破壞之慘酷，蓋有甚於歐戰十百倍者矣。夫此項預言，未必皆能實現。然使世界而不及早大同，則將來如果發生大戰，又孰能保其必不實現耶。噫嘻，世變急矣，時機迫矣，全人類根本解決之大同政府，不可緩矣。

十

就人類各個之壽命而言，平均之數，不過四五十年耳。以如此短促之年，寄生於世，何爲日日準備互相屠戮，而不思所以共享人世間之幸福耶。且吾全人類寄生於此地球上，其期間蓋亦有限。據近世天文學家，多謂地球本有多次之冰雪時期。南北兩極之冰雪猶在，即地球之與冰雪，猶未脫離其固有之關係。冰雪時期，一旦復

至，則吾全人類，俱被其淹沒矣。又有謂地球之游行於空中，與其他多數恒星，及多數游星，他日難免不發生衝突。一旦彼此相撞，吾人類寄生之地球，即不免歸於破裂矣。又有謂太陽之熱度日減，直徑日縮，其吸力與熱力，恐亦有不能保存之時。吾人類托足之地球，即不免為凜冽之寒氣所包圍，而同歸於盡矣。以上諸說，固不可信，亦不敢不信。哀哀吾人類，同屬寄生蟲，亦同屬可憐蟲。胡為乎日日摩拳擦掌，陰謀侵略，互相殘害耶。胡為乎不思及時行樂，相與歡嬉優游於黃金世界耶。

第二章 大同議會及大同政府之組織

一

由全世界各國家各地方之人，舉出代議士，以組織大同議會。今假定每二百萬成年，舉出代議士一名，可共得代議士五六百名。

全世選民，概爲普及制。不論貧富，不論貴賤，並不論財產之有無，納稅之多寡。凡至成年之人，皆有選舉權。

被選人不受何種限制。惟當大同制度創立之初期，凡屬大同議會之代議士，須以大同會會員爲限。蓋當大同制度根基未固之際，如果被選人爲大同主義之反對者，當選之後，加以破壞，則大同事業，實甚危險。若爲大同會會員，則入會之際，須有赤心擁護大同主義之宣誓，且能遵守大同會會規也。

大同議會之選舉法，詳下篇政治制度。

二

上述之議會，爲大同議會之一院。其他一院，則爲大同女議院焉。夫植物之所以能開美麗之花，而結鮮香之果者，賴有雌雄兩蕊之結合。動物之所以能發達繁榮者，賴有牝牡兩性之共助。電流電光之所以能發生運用者，賴有陰陽兩性之中和。人類社會之有男女，亦何獨不然。彼數千年來政治制度之不上進，人類真正幸福之